

四庫全書

子部

欽定四庫全書

外臺秘要方卷二十四

唐 王燾 撰

癰疽方一十四首

集驗癰疽論黃帝曰夫子言癰疽何以別之岐伯答曰
榮衛稽留於經脉之中則血泣而不行不行則衛氣從
之從之而不通壅遏不得行故熱大熱不止熱勝則肉
腐肉腐則為膿然不能陷肌膚於骨髓骨髓不為焦枯

五臟不為傷故命曰癰黃帝曰何謂疽岐伯答曰熱氣純盛下陷肌膚筋髓骨肉內連五臟血氣竭盡當其癰下筋骨良肉皆無餘故命曰疽疽者其上皮夭瘵以堅亦如牛領之皮癰者其上皮薄以澤此其候黃帝曰善

出太素第
十六卷中

經言五藏不調致疽六腑不和生癰一曰燔疽急者二三日殺人緩者十餘日殺人二曰癰疽急者十餘日殺人緩者一月死三曰緩疽急者一年殺人緩者數年四

曰水疽所發多在手足數年猶可療疽者數十種要如此于氏法癰之疾所發緩地不殺人所發若在險地宜令即外消若至小膿猶可療大膿致禍矣

一為腦尸 二為舌本 三為玄癰 四為喉節

五為胡脉 六為五藏俞 七為五藏繫

八為兩乳 九為心鳩尾 十為兩手魚

十一為腸屈之間 十二為小道之後

十三為九孔 十四為兩膈腸

十五為神主之舍

一本云主客之舍

凡十五處不可傷而況於癰乎若癰發此地遇良醫

能不及大膿者可救至大膿害及矣

范汪同

候賊風證但夜痛應骨不可按抑不得迴轉痛處不壯熱體亦不乍寒乍熱但覺體疹疹然冷欲得熱熱慰痛處即小寬時有汗此是賊風證也宜即得針灸服療風

藥溫也

方在療風候上大法宜知二候如此也

又初得附骨疽即服漏蘆湯下之傳小豆薄得消也

又下利已腫處未消者可除大黃用生地黃及乾地黃
隨時也熱漸退餘風未歇者可服五香連翹湯除大黃
餘熱未消可傳升麻膏佳若失時不消成膿者用火針
膏散如療癰法又有膈疾喜著四肢其狀赤脉起如編
繩急痛壯熱其發於脚者喜從躡蹠起至踝赤如編繩
謂之膈病也又其發於臂者喜腋下起至掌也皆由四
肢勞熱氣盛為涼濕所折風結筋中成此疾也不即療
取消潰去膿則筋攣縮也其若但置不消復不潰其熱

歇氣不散喜變作膈也

又療之宜服漏蘆湯令下外以鋒針針去血氣針寫上結脉處傳小豆薄則消也皆可依療丹法消之及潰成膿出火針傳膏散如療癰法也

又亦用甘蕉根薄之差

又癰發腫高者病源淺腫下者病源深大熱者易療小熱者難療初便大痛傷肌晚乃大痛傷骨都堅者未有膿半堅半軟者有膿發腫都軟血瘤也非癰發腫以漸

知長引日月亦不大熱時時牽痛瘤也非癰吳音曰謂諸氣結亦有腫久久不消成癰療之宜散氣氣已散若初腫處有浮氣年衰皆發癰療之宜及年盛竝折散熱可無此憂

于氏法夫癰疽脉洪麤難療脉微濇者易療諸浮數之脉應當發熱而反惡寒者癰也此或附骨以有膿也

趙乃言無虛勞腹中疾或發血瘤瘡瘡狀墳起頭墨正爾置不當灸療療之火熨便焦爛剝刮去焦痂則血泄

不可禁必死癰起於節解遇頑醫不能即消令至大膿者豈膏藥可得復生乎

又發癰堅如石走皮中無根瘰癧也久不消因得他熱之疾時有發為癰也

又發癰至堅而有根者名為石癰療之法當服酒非酒即藥勢不宣但當稍飲取令相得和散便止凡癰腫有肥人用貼宜栝蒌根和平體宜赤小豆貼方

以赤小豆五合內苦酒中熬之畢擣為散以苦酒

和之塗拭紙上貼腫從發腫兩頭以下

范汪同

又論少小有渴年四十以外多發癰疽有膈疾而渴者
年盛必作黃疸年衰必發癰疽也

范汪同

又黃帝曰願聞癰疽之形與其期日岐伯曰畧說癰疽
之極者十八種

又癰疽發咽名曰猛疽猛疽不療則化血為膿膿不寫
塞咽半日死其化膿者寫已則含豕膏無冷食三日而
已一去無食

又發於股胫名曰股脫疽其狀不甚變而癰腫膿搏骨

不急療三十日死

髀內曰股股外曰髀膝上股下骨稱曰股胫也

又發於脇名曰改訾改訾者女子之疾也久之其狀大癰膿其中乃有生肉大如赤小豆療之方

劉連翹草及根各一升以水一斗六升煮令竭取三升即強飲厚衣坐釜上令汗出至足已

又發於尻者名曰銳疽其狀赤堅大急療之不療三十日死

又發於脛者名曰兔囓其狀赤至骨急療之不療害人
又發於足上下者名曰四淫其狀大如癰不急療百日
死

又發於肩及臑者名曰疵疽其狀赤黑急療之此令人
汗出至足不害五藏癰發四五日逆熯之

上灸百壯石子當碎出也不出可益壯

從癰發高下以
後范汪並同

又石癰者始發皮核相親著不赤頭不甚堅微痛熱熱
漸自歇便堅如石故謂之石癰難消又不可得自熟縱

愈皆百餘日也又發癰兩頭牽而旁推無根者又不痛結筋非癰也發癰狀如蛇雖極大此肉瘤非癰也腫一寸至三寸癰也三寸至五寸癰也五寸至一尺癰疽也一尺至三尺名曰竟體疽腫成膿九孔皆出諸氣憤鬱不遂志欲者多發此疾癰及疽血瘤鼠乳石癰結筋瘤瘰皆不可就針角針角少不及禍者

凡癰疽之疾未見膿易療之當上灸三百壯四邊間子灸各二百壯實者可下之虛者可補之有氣者下其氣

服占斯內塞散得愈絕房三年凡癰瘡審知膿者破之
皆當近下邊膿出後當膏藥兌之常使開潤勿令燥合
也若其人羸勿一頓盡膿徐徐令後稍出乃盡癰方潰
其上皮薄人喜當上破之此終不愈當下破之乃得膿
耳勿要其皮厚也凡癰有膿當破無膿但氣腫若有血
慎不可破針灸也按之四邊堅中軟此為有膿潘也一
邊軟亦有膿都堅者此為苴核或但有氣也都軟者此
為有血血瘤也當審堅軟虛實為要若堅疽積久後若

更變熱偏有軟處不可破者疽當暖裹置耳若灸刺破
療必暴劇不可救及結筋腫

馳偽切

肉鼠乳皆不當療也

又服內塞散不與他療相害晝夜十餘度服散當以酒
又發於腋下堅赤者名曰米疽療之用砭石欲細而長
疎啟之塗以豕膏六日已勿裹其癰堅而不潰者為馬

刀挾纓急療之

太素經曰
頸前已纓

又發於股陰者名曰赤弛不急療六日死在兩股之內
不可療一云六十日死

又發於膝者名曰疵疽其狀大癰色不變寒熱如堅石
勿石石之死須其柔色異乃石之者生
冷石熨之柔乃破之準倒之也
又諸癰腫之發於節而相應者不可療
大素經云膈八節門故不可療也

又發於陽者百日死

又發於陰者三十日死

丈夫陽器曰陽婦人陰器曰陰

又發於踝者名曰走緩其狀肉色不變數石其輸而止
其寒熱不死

又發於足傍者名曰厲疽其狀不大初從小指發急療

之去其黑者不消輒益不療百日死

云足側也

又發於胸者名曰背疽狀如大豆三四日起不早療下

入腹入腹不療十日死

太素經云寒熱不去十日早死

又發於足指者名曰脫疽其狀赤黑死不療不赤黑可

療療不衰急斬去之得活不去者死

又發於膚者名曰舌疽其狀如穀實瓜萑常苦寒熱急

療之去其寒熱不療十歲死死後出膿

又發於頸者名曰天疽其狀大而赤黑不急療則熱氣

下入淵腋前傷任脉內熏肝肺十餘日死

太素經曰項曰前曰頸

一云發頭

以前十八種並

千金論曰夫癰疽初發人皆不以為急此實竒患唯宜速療若療不速病成難救以此致禍者不一發皆外皮薄為癰皮厚為疽宜急治之夫癰壞後有惡肉者以豬蹄湯洗去穢次傅食肉膏散惡肉盡傅生肉膏散及摩四邊令善肉速生當斷絕房室慎風冷勞煩待筋脉平

復乃可任意耳不爾新肉易傷傷則重潰發發則禍至
慎之慎之

凡癰疽始發或似小節或復大痛或復小痛或發如米
粒大白膿子此皆微候宜善察之見有少異即須大驚
忙須急治之及斷口味速服諸湯下去熱毒若無醫藥
即灸當頭百壯其大重者灸四面及頭上二三百壯壯
數不慮多也復薄冷藥貼膏種種救療必差也

又其用藥貼法皆須當瘡中處開孔口令洩瘡熱氣出

亦當頭以大針針入四分即差

身中忽有痛處似打狀名曰氣痛痛不可忍遊走不住
發作有時痛則小熱痛定則寒此皆由冬受溫風至春
暴寒風來折之不成溫病乃作氣痛也又宜先服五香
連翹湯摩丹參膏又以白酒煮楊柳皮及暖熨之有赤
氣點點刺出血也其連翹湯可服數劑及竹瀝湯勿以
一劑未效便謂即止遂不服耳中間將白薇散佳

素問曰寒氣客於經絡血凝滲澀不行壅結為癰疽也

不言熱之作也其後成癰又陽氣湊集化寒為熱熱盛則肉腐為膿也又以酢和蜂蛤灰塗之乾即易差即止凡腫根廣一寸以下名癰一寸以上名小癰如豆粒大者名皰子皆始作急服五香連翹湯下之數劑即差止

並出第二
十三卷中

廣濟療癰疽排膿散方

黃芪 十分
多倍 膿

青小豆 一分
口乾倍 熱

芍藥 三分
不生倍 肉

痛不
止倍

白斂 三分
不合倍 有膿

栝蒌 三分
小便利倍 若渴

甘草 三分

灸

右七味為散酒服方寸七日三服不利忌海藻松菜

熱麴魚蒜等

千金同一方
無白斂甘草

又療發癰疽排膿散方

人參

二兩

當歸

二兩

桂心

二兩

芎藭

一兩

厚朴

一兩
灸

甘草

一兩
灸

防風

二兩

白芷

二兩

桔梗

一兩

右九味搗篩為散以酒服方寸七日二服不利若瘡

未合常服之忌生冷菰菜海藻生葱蒜

並出第五卷中

劉涓子療癰疽先宜傳大黃食肉膏方在發背部千金方食惡肉散後用大黃附子等十物者乃是次兌膏方

當歸

芎藭

白芷

各二兩

烏頭

一兩

巴豆

二十枚去皮

松脂 二兩

豬肪

二分

右七味咬咀內膏中微火合煎三沸已內松脂攪令相得以綿布絞去滓以膏著綿絮兌頭大瘡雖深兌之膿自出就兌盡即生善肉瘡淺者不足兌著瘡中

日三惡肉盡即止

又療癰疽發壞出血生肉黃耆膏方

黃芪

一兩

芍藥

一兩

當歸

一兩

大黃

芎藭

獨活

白芷

薤白

生地黄

各一兩

右九味切猪膏二升半煎三上三下膏成絞去滓傅

兒瘡上摩左右日三文仲同

並出第四卷中

又療癰疽瘡生肉黃芪膏方

黃芪

細辛

生地黄

蜀椒

當歸

芍藥

薤白

白芷

芎藭

丹參

各一兩

猪膏

一升半臘月者

甘草

從蓉

獨活

黃芩

各一兩

右十五味以苦酒一升二合夏月漬一宿冬月二宿

微火煎三沸煮酒氣盡成傅之

又療癰疽始作便壞熱毒發瘡膏方

羊髓

一兩

甘草

二兩

胡粉

五分一兩法五兩

大黃

一兩

豬膏 二升

右五味切合膏髓煎二味烱內甘草大黃三上三下
絞去滓內胡粉攪令調和傅瘡上日五度

又療癰疽已潰白芷摩膏方

白芷

甘草

各二分

烏頭

三分

薤白

十五挺

青竹茹

雞子大一枚

右五味切以豬膏一升合煎白芷黃膏成絞去滓塗

瘡四邊勿著瘡中

並出第五卷中

師深內塞散療癰疽潰漏血脉空竭方

黃芪

細辛

芍藥

薏苡仁

白芷

瞿麥

各二兩

赤小豆

七兩

乾地黄

人參

防風

各二兩

右十味切先以新成白苦酒置新器中內赤小豆須

臬出銅器中熬令燥復須內苦酒中更熬凡五反止

合擣為散酒服方寸匕日夜六七過腹痛甚倍芍藥

口未閉倍薏苡仁膿多倍黃芪

出第二十卷中

刪繁療癰疽等毒潰爛猪蹄洗湯方

猪蹄

一具治如食法

薔薇根

一斤

甘草

五兩炙

芍藥

五兩

白芷

五兩

右五味切以水二斗煮猪蹄取八升去滓下諸藥煮

取四升稍稍洗瘡

出第九卷中

千金翼黃帝問曰有疽死者奈何岐伯曰身有五部伏

菟一腠二

一云膊

背三五藏之腧四項五五部有疽死也

刪繁同本

出靈樞

又王不留行散主癰疽及諸雜腫潰皆服之亦療癰腫
不潰苦困無賴方

野葛皮

半分

五色龍骨

五兩

王不留行子

二升千金方用三合

翼云
一升

桂心

一兩

當歸

二兩

乾薑

一兩

栝樓

未六合

右七味為散食訖溫酒服方寸匕日三以四肢習習
為度不知漸漸加之此浩仲堪方隨日濟闔黎施行
實為神散癰腫即消此方妙

千金同出第
十四卷中

癰腫方二十五首

集驗療癰腫大按乃痛者病深小按便痛者病淺按之處陷不復者無膿按之即復者有膿若當上破者膿出不盡不盡稍深蝕骨骨碎出當以魚鱗側際從下頭破令膿出盡出盡則骨生愈矣若惡肉不盡者食惡肉藥去之膏塗之即愈食肉藥方

取白荻灰水淋之煎令如膏此不宜預作作之十日則歇并可以去黑子黑子藥注便即拭去不時

拭則傷膚又一方以桑皮灰亦妙

凡破諸病肉厚處當先廣封四面不爾瘡披裂氣泄便

死不可救也

以前范汪同

有久癰餘瘡為敗癰深疽有脛間

喜生瘡中外惡瘡霜寒凍不差經年或骨疽亦名脛瘡

深爛青黑四邊堅強中央膿血惡汁出百藥療不差汁

潰好肉處皆腫亦有碎骨從中出者可溫赤龍皮湯洗

之夏月日日洗之冬日三日四日一洗潰肉多者可時

傅白蘭茹散食去之可一日之中三四傅之止後長傅

家猪尿散得差也

取猪矢燒作灰下絹篩以粉疽敗瘡中令滿汁出
脱去便傅之長傅須差也若更生青肉復著白藺
茹散如前法也

出第八
卷中

千金翼凡五子日夜半 五丑日鷄鳴 五寅日平旦

五卯日日出 五辰日食時 五巳日禺中

五午日日中 五未日日昃 五申日晡時

五酉日日入 五戌日黃昏 五亥日人定

右以此日時遇疾發者皆不起也

出第二十卷中

廣濟療癰腫潰內服藥外宜貼膏方

松脂

一斤煉者

樞脂

三合生

椒葉

一兩

白蠟

三兩

蛇銜

一兩

黃芪

一兩

芎藭

一兩

白芷

一兩

當歸

一兩

細辛

一兩

芍藥

一兩

右十一味切以水先煎脂蠟烊盡內諸藥三上三下
白芷色黃膏成用剪故帛可瘡大小塗膏貼上日夜
各一

又療癰腫膿潰瘡中有紫肉硬不消以此散兌頭內蝕之方

石硫黃

一分
研

馬齒礬石

二分
熬
令汁盡

漆頭蔞茹

二分

麝香

二分
研

雄黃

二分

雌黃

一分
研

白礬

二分
熬
令汁盡

丹砂

二分
研

右八味擣篩為散攪令調熟以傅瘡中瘡惡肉上貼

膏日二易

千金并異深師同
並出第三十卷中

劉涓子療癰腫方

白斂

烏頭炮

黃芩 各等分

右三味擣下篩和雞子白傅上即愈

出第十卷中

療癰腫有熱黃芪貼方數用神驗

甘草炙

大黃

白斂

黃

芎藭

右五味各等分擣篩以雞子黃和如濁泥塗布上隨

赤熱有堅處大小貼之燥易甚效

刪繁療癰腫白斂薄貼方

白斂

當歸

芍藥

大黃

莽草

芍藥

右六味各等分擣篩下雞子黃和如泥塗布隨大小貼之燥易

又療癰腫堅核不消白斂貼之方

白斂

大黃

赤石脂

芍藥

莽草

黃芩

黃連

茱萸

右八味各等分擣篩以雞子黃和如濁泥塗布上隨

核大小貼之燥易

又療癰腫黃芪貼之方

黃芪

半一兩

黃芩

一兩

芍藥

一兩

黃連

白芷

芍藥

各二兩

當歸

半一兩

右七味擣篩以雞子白和如膏諸暴腫起處以塗著布上已貼燥易腫處不覺貼冷便愈熱勢毒者加白斂一兩尤佳

又療癰腫黃芪貼方

黃芪

大黃

白芷

牡蠣

熬

白斂

右五味各等分搗篩和雞子貼燥易

又療癰腫已潰四物黃連薄貼方

黃連

黃蘗

地榆

白芷

各一兩

右藥搗篩雞子白和塗布薄攤上對瘡口穿布出癰

氣令疎氣

又療癰腫一物枯樓薄貼方

以栝樓根隨多少止一物切五片內苦酒中熬燥
擣篩之苦酒和塗紙上以貼癰腫上服散人宜用

並出第
九卷中

千金療癰腫松脂貼方

當歸

黃芪

黃連

芍藥

蠟

黃芩

芎藭

大黃

各一
兩細

切

松脂

一斤
半

脰脂

一合
半

右十味切以微火煎之三上三下綿布絞去滓向火

灸塗生牋紙上隨大小貼之一日三度易之即差

又療腫疾藥散方

蒺藜子

一升熬
令黃

右一味擣篩以麻油和之如泥炒令焦黑以塗故布
上剪如腫大勿開頭搯上無蒺藜子用小豆和雞子
如前乾則易之甚妙

又搯湯方

大黃

黃芩

白斂

各三兩

芒硝

六分

右四味以水六升煮取三升以故帛四重內汁中以
搯腫上煖復易晝夜為之

冀同

又癰腫痛煩困方

以生楸葉十重貼之以布綿裹緩急得所日二易
止痛消腫食膿血良無比勝於衆貼冬以前收乾
者臨時鹽湯沃潤用之亦可薄削楸皮用之

備急
張大

仲肘
後同

又諸癰腫牢堅諸藥不療方

削附子如碁子厚一指正著腫上以少唾濕附子
火炙附子令熱徹附子欲乾輒令更唾濕之常令
附子熱氣入腫中無不愈者此法絕妙

並出第二十三卷中

千金翼黃芪湯主癰腫熱盛口乾除熱止渴方

黃芪

升麻

栝樓

乾地黄

各二

兩

麥門冬

去心

芍藥

各二兩

黃芩

一兩半

梔子

二十枚擘

右八味切以水一斗煮取三升分三服

劉涓子用升麻一兩梔子

十四枚
餘藥同

又白斂薄貼主癰腫方

白斂

大黃

黃芩
各等分

右三味擣篩和雞子白如泥塗布上薄貼腫上乾則易之可以三指撮藥末內三升水中煮三沸綿注汁拭腫上數十遍以寒水石末和塗腫上以紙覆之乾則易之一易輒以煮拭之日夜三十度

劉涓子同

又療癰腫方

伏龍肝以大酢和作泥塗布上貼之乾則易之消
矣

又凡腫已潰未潰者方

以膠一片水漬令軟納納然稱腫之大小貼當頭
上開孔若已潰還合者膿當被膠急撮之膿皆出
盡未有膿者腫當自消矣

又方

燒鯉魚作灰酢和塗之一切腫上以差為度至良

又溫中湯主癰腫取冷過多寒中下利食完出方

甘草

炙

乾薑

附子

各六分炮

蜀椒

二百四十

枚汗

右四味切以水六升煮取二升分三服忌海藻松菜

猪肉冷水

劉涓子同出第二十三卷中

張文仲劉涓子療癰消膿木占斯散方

木占斯

桂心

人參

細辛

敗醬

乾薑

厚朴

炙

甘草

防風

桔梗

各一兩

枳椇

一兩

右十一味搗為散服方寸匕入咽覺流入瘡中若癰
及疽灸亦不能發壞者可服之瘡未壞者去敗醬已
壞發膿者內敗醬此藥時有化癰疽令成水為妙

隱居必效方消癰腫

白斂

二分

藜蘆

一分

右二味搗為末以苦酒和如泥貼腫上日三大良

備急

同出第

五卷中

石癰方五首

千金堅如石核復大色不變或作石癰療之鍊石散方

鹿角

八兩一作白灰

白斂

三兩

粗理黃石

一斤酢五升先燒石令赤

內酢中復燒內之酢盡半止

右三味擣篩作細末以餘酢拌和如泥厚塗之乾即塗取消止盡更合諸漏瘰癧藥悉皆主之並須火針

瘡上塗膏

又方

單磨鹿角半夏塗不如上方佳也

集驗文仲小品
古今錄驗同

又療石癰堅如石不作膿方

以生商陸根爛搗傳之燥則易之治腦漏及諸癰

癰

古今錄
驗同

又方

以蜀桑根白皮陰乾搗末消膠以酒和傳上即拔

出

並出第二
十三卷中

備急療若發腫至堅而有根者名曰石癰也方

灸腫三百壯當石子破碎出如不出益壯乃出其

癰疽石癰結筋療瘰皆不可針角針角殺人

集驗
文仲

千金同出

第四卷中

癰癰方一十四首

劉涓子療癰癰諸腫有熱方

地黄

三斤洗
細切

右一味以水一斗煮取三升去滓煎湯令小厚以塗

紙當瘡中央貼之日再三易數用大良並療牛領上

腫

出第十
卷中

集驗療癰及癰如結實赤熱者方

以水磨半夏塗之燥復更塗得流便消也出草中

可自掘生半夏乃佳此療神驗勿不信也

出第八
卷中

千金療凡癰無頭者

吞葵子一枚即出勿多服頭多也

又方

燒葛蔓灰封上自消

又方

牛糞封之佳

又方

以鼠粘葉貼之

又方

用水和雀糞傅之

又方

猪頭骨

芸薹子

右二味等分為末和酢封之

又療癰癤潰後膿不斷及諸物刺傷不差方

取石硫黃三兩粉之一味筋一片碓頭令碎少濕

之內石硫黃中刺瘡孔以瘡差為度

通按筋字可疑

又乾地黃丸主虛熱消瘡癰方

乾地黃

四兩

大黃

六兩

桂心

二兩

芍藥

三兩

茯苓

三兩

王不留行

二兩

黃芩

二兩

麥門冬

二兩

去心

遠志

二兩

升麻

二兩

人參

二兩

甘草 二兩 炙

枳實 二兩 炙

右十三味搗篩蜜和丸如梧子大酒服十九日三加

至二十九長服令人肥健 翼同

又地黄煎方補虛除熱可將和服取利也散石癰疽癰痔熱悉宜服百日癰疽永不發也

取生地黄隨多少三搗三押取汁令盡一味以新布重絞其汁澄清置銅器中湯上煮之減半復下更新布絞去麤碎結濁者滓穢盡復煎之濃竭令

如飴糖置甕器中酒服如彈丸大日三勿加至百
日服之有驗

又梔子湯主表裏俱熱三焦不實身體生瘡或發癰瘡
大小便不利方

芒硝

二兩

大黃

四兩

梔子

二七枚擘

黃芩

二兩

知母

二兩

甘草

二兩炙

右六味切以水五升煮減半下大黃煮取一升八合

去滓內芒硝二兩分三服忌海藻菘菜

並出第一十三卷中

千金翼論曰一切癰疽皆是瘡痕根本所患癰之後膿汁不止得冷即是鼠瘻是以漏方次之大須急救之

馬齒草

五斤切

槲白皮

一斤水五升煮取一升澄清

麝香

半臍乾之仍研

末作

杏仁

半斤油煎令黑持如膏

右四味以瓷器貯之合和以三四重綿密繫口病已成瘡者以泔清淨洗拭乾剪作貼子塗藥貼著瘡上日三易若未作瘡如作瘰癧子者以艾一升熏黃如棗大乾漆如棗大末之釜月下土三味並末和艾作

炷灸三七壯

本方療鼠瘻出
第二十三卷中

又主癰腫方

生椒末麴末釜月下土末之以大酢和傅之

並出
第二

十四

卷中

附骨疽方八首

千金診附骨疽法凡附骨疽者無故附骨成膿故名附
骨疽喜著大節解中丈夫產婦喜著胯髀嬰兒亦著脊
背丈夫急者先覺痛不得動搖按之應骨痛經日便覺

皮肉漸急洪腫如肥狀是也小兒纔近便大啼呼即是
肢節有痛候也大人緩者先覺肥洪洪然經日便覺痺
痛不隨小兒四肢不能動搖亦如不隨狀著肢節解中
有洪洪處不知是附骨疽令遍身成腫不至潰死體皆
青黯大人亦有不別是附骨疽呼為賊風風腫也

又凡人身體患熱當風取涼風入骨解中風熱相搏便
成附骨疽其候嗜眠沈重忽忽耳鳴又秋夏露卧為冷
所折風熱伏結而作此疾急者熱多風少緩者風多熱

少小兒未知取風冷何意而有此疾由其血氣盛肌嫩漸為風冷折之即湊理凝結故也

又凡骨疽者久瘡不差差而復發骨從孔中出名為骨疽方

以猪膽和楸葉搗封之

又方

搗白楊葉下篩傳之

又方

穿地作坑口小裏大深三尺取乾雞屎五升以艾
及荊葉和之令可燃火令煙出內疽孔坑中以衣
擁坑口勿洩煙半日許當有蟲出

又癰疽敗及骨疽方

末龍骨粉瘡四面厚二分

又方

用自死蝦蟇一枚頭髮一把以猪膏一片半內二
物煎之消盡下之欲冷內鹽一合攪和以膏著瘡

中日一易蟲出如髮蟲盡愈

又骨疽百方療不差方

可瘡上以艾灸之三日三夜無不愈也

並出第二十三卷中

備急若骨疽積年每一年一發汁出不差方

取膠熬擣末粉勃療上及破生鱧魚以搗之如食

頃刮視其小蟲出更洗更傅蟲出盡止

備急文仲同

又療疽瘡骨出方

黃連

牡蠣

各二分熬

又二味末先以鹽湯洗以粉之

文仲同出
第四卷中

療疽方一十六首

集驗論胃中痛少氣急入闇中以手掩左眼竟視右眼
見光者胃中結癰也若不見光療疽內發若吐膿血此
不療之疾宜以灰掩膿血上不爾著傍人也又齒間臭
熱血出是療疽也七日死療所不差宜以灰掩地血療
疽喜著指與代指相似人不別者亦呼作代指不急療
其毒逐脉上入藏殺人也南方人得此疾皆斬去指恐

其毒上攻藏故癰疽著指頭者其先作黯疤然後腫赤
黑黯疹痛入心是也

出第八
卷中

千金癰疽論說曰癰疽者肉中忽生點子如豆粒小者
如黍粟劇者如梅李或黑赤青白不定一種其狀有根
不浮腫痛疹應心根深至肌少久便四面悉腫胞黯黯
紫黑色能爛壞筋骨也毒散逐脉入藏殺人南方人名
為榻著毒著厚肉處即割去之亦燒鐵烙疤上合焦如
炭亦疤上灸百壯為佳單擣酸草葉傳腫四面防其長

大飲葵根汁及藍青汁若犀角汁升麻汁竹瀝汁黃龍湯諸單療折其勢耳其病亦喜著指故與代指相似人不識之呼作代指不急療之亦逐脉上入五藏殺人南方人得之皆斬去指疽著指初指頭先作黯疤然後腫赤黑黯瘡痛入心是也復有惡肉病者身上忽有肉如赤豆粒突出便長推出如牛馬乳上如雞冠狀不療自長出不止不痛癢此由春冬時受惡風入肌脉中變成此疾療之宜服漏蘆湯外燒爍日日為之令焦盡竟以

升麻膏傳之積日乃差

備急同出第二十三卷中

劉涓子療癰疽侵淫廣大羊髓膏方

羊髓

二兩

大黃

甘草

炙

胡粉

各二兩

右四味咬咀以猪膏二升半合煎微火三上三下絞

去滓傳曰四五

深師云魚療赤黑爛壞成瘡出第五卷中

千金療癰疽著手足肩背累累如米起色白刮之汁出

愈復發方

黃芪

六分

款冬花

二分

升麻

四分

附子

一分炮

苦參一分

赤小豆一分

右六味下篩酒服半錢匕漸增至一錢日三服

范汪方無

苦參有赤小豆

又方

虎糞白者以馬尿和之暴令乾燒灰粉之

糞同

又方

胡粉

青木香

龍骨

滑石

各二兩

右四味下篩以米粉一升和之稍以粉之日四五

又方

竈室塵

竈突中墨

竈釜底土

各一升

右三味合研令勻以清水一斗煮三沸取汁洗療日

二三度

又凡瘰癧手足肩背忽礫礫如赤小豆刺之汁出者是療之方

剥却瘡皮溫泔清洗胡鷺窠和百日男子矢塗之

又方

熬蕪菁子熟搗綿裹傳之勿止

文仲備急
肘後同

又方

熬麻子末摩上日五六度

又方

麴和酒傳之

又方

鯽魚三寸長者亂髮如雞子大猪脂一斤煎以成

膏塗之

又療瘰癧秘方世所不傳神良無比

射干

甘草

炙

升麻

枳實

炙各二兩

大黃

十分

麝香

二分研

乾地黃

二兩

犀角

六分屑

前胡

三兩本方云三分

右九味切以水九升煮取三升分三服差止不限劑

數

翼同深師加黃芩十分餘同

又瘰癧漏蘆湯方

漏蘆

白斂

黃芩

麻黃

去節

白薇

枳實

炙

升麻

芍藥

甘草

各二兩炙

大黃

三兩

右十味切以水一升煮取三升分三服無藥單用大

黃下之良

張大仲備急並翼並同

又升麻膏方

升麻

白薇

漏蘆

連翹

芒硝

各二兩

黃芩

蛇銜

枳實

各二兩炙

梔子仁

二十枚

蒴藿

四兩

右十味切搗破令細後以水三升漬半日以猪膏五升煎水氣竭去滓傳諸丹毒皆用及熱瘡腫上並日三易之

升麻搯湯方

升麻

漏蘆

芒硝

各二兩

梔子

二十枚

黃芩

三兩

右五味切以水一斗合蒴藿五兩煎取七升冷搯諸丹腫上常令濕內宜服漏蘆湯甚佳

又療瘰癧浸淫多汁日就侵大胡粉散方

胡粉一分

黃連三分

甘草二分

蘭茹二分

右四味下篩以粉瘡上日三

翼文仲備急深師同並出第二十三卷中

千金翼薄榆湯主瘰癧浸淫欲作未成或如桃李核或如雞子赤皴方

甘草炙

黃芩

大黃

黃連

當歸

芒硝

各兩

右六味切以水一斗煎取三升絞去滓鎔中下芒硝

一沸攪之貼布帛中以揄腫上數百遍

劉涓子深師同出第二十

三卷
中

緩疽方四首

集驗論有緩疽者初結腫形似癰回回無頭尾其色不異但痛深有根核又與皮肉相親著外耳一名內癰其有大者如拳小者如桃李狀積日不消喜變紫色黯黑久即皮肉俱爛如牛領瘡狀便通體遍青黯色而不作頭穿潰出膿初作服五香連翹湯鑱去血以小豆薄塗

之其間數針錢去血又薄之取消也若不消色未變青
黯者以鍊石薄之若失時不得療已爛者猶服五香連
翹湯及漏蘆湯下之隨熱多少投方也外以升麻湯搗
洗之薄升麻膏若生臭惡肉者可以單行一物白蔞茹
散傳之青肉去盡便停也好肉既生但薄升麻膏良不
生單傳一物黃芪散也若傳白蔞茹散積日青惡肉不
盡者可以漆頭赤皮蔞茹取半錢匕和大三錢匕白蔞
茹散中合和傳之惡肉去盡還以淳用白蔞茹散也視

好肉欲生可傳黃芪散也黃芪散方白藺茹散方漆頭

藺茹散方並一味單行隨多少擣篩為散

出第八卷中

范汪飛黃散療緩疽惡瘡食惡肉方

取丹砂著瓦盆南雌黃著中央磁石北曾青東白石英西礬石上石膏次鍾乳下雄黃覆雲母薄布下各二兩先擣篩瓦盆中以一盆覆上羊毛泥令厚作三隅竈燒之以陳葦一日成取其飛者使之甚妙

又療緩疽以飛黃散食惡肉令盡作土竈熏之方

雄黃

一兩

雞白屎

一兩

礬蘆

一兩

丹砂

一兩

乾鰻鱺魚

一兩

右五味擣下篩青布裹之熏經三日乃止止畢要以

蛇銜膏摩之良

簡范汪方無蛇銜膏崔氏方附於後並出第三十一卷中

崔氏蛇銜膏療癰腫瘀血產後血積耳目暗等牛領馬

鞍瘡方

蛇銜

一兩

大黃

附子

去黑皮

芍藥

當歸

細辛

黃芩

大戟

椒去月

莽草

獨活各一兩

薤白十四莖

右十二味並切之以苦酒淹之一宿以不中水成鍊

猪膏二升龍銜藤一兩合膏煎名龍銜膏今又有龍

草似蛇銜而葉大耳亦有取其根合煎者亦名龍銜

膏出第二卷中

小品療緩疽初作即以小豆薄塗之亦消也出第十卷中

發背方四十一首其乳石發背自有正方在第三十八卷中具述

千金論曰凡發背皆由服餌五石寒食更生散所致亦有單服鍾乳而發者亦有生平不服諸石而自發背者此是上代有服之者其候率多於背兩胛間起初如粟米大或痛或癢仍作赤色人皆初不以為事日漸長大不過十日遂至不救其臨困時方圓徑三四寸高一寸瘡有數十孔以手按之諸孔之膿皆反出尋即失音不言所以養生者小覺背上痛痒有異即取淨土冷水和泥捻作餅子徑一寸半厚二分以麤艾大作炷灸泥上

貼著瘡上灸之一炷一易餅子若粟米大時可灸七餅
即差若榆莢大灸二七炷即差至錢許大日夜灸不住
乃差并服五香連翹湯及鐵漿諸藥攻之乃愈又常以
冷水射之漬冷石熨之日夜勿止待差住手此病忌麪
酒肉五辛等亦有當兩腎上發者

又論曰凡服石人皆須大勞役四體無得自安如其不
爾多有發動亦不得遂便恣意取煖稱適已情必須違
欲以取寒凍雖當時不寧於後在身多有所益終無發

動之慮

又發背方

凡腫起於背胛中頭白如黍粟四面相連腫赤黑
令人悶亂者名發背也即禁房慎蒜麪不速灸治
即入內殺人矣當瘡上七八百壯有人不識多作
雜腫療之皆死

又方

取亂髮灰酒服方寸匕

又方

以三年酢滓微火煎令調和牛脂封上日一易

又方

取狗牙灰酢和傅之

又方

取猪羊脂封之亦療發乳

又方

以蛇頭灰水和傅之

又方

飲鐵漿三升下利為佳

又方

以鹿角灰酢和塗之

古今錄
驗同

又方

燒古蟬末之如粉雞子白和傅上日三即差止

又發背及癰疽潰漏並未潰毒腫方

栝樓

榆皮

胡鷺窠

鼯鼠土

女人月水布洗取汁

右五味並須等分以月水汁和如泥封腫上乾即易之潰者四面封已覺即封從一日至五日令差翼同

又療癰疽潰漏發背及小小瘰癧李根散方

李根

半夏洗

桔樓各一升

甘草二兩炙

葛根三兩

桂心四兩

當歸二兩

通草二兩

芎藭一兩半

白斂一兩

桔梗二兩

厚朴炙

黃芩各一兩

芍藥四兩

附子一兩炮

右十五味為散酒服方寸匕日三瘡大困者夜再服
有患發背骨出身有三十餘癰癰服此差忌羊肉錫

海藻菰菜猪肉冷水生葱

范汪同

又治諸虛不足發背癰疽經年差後復發或由大風聚
結毒氣在內閉塞夏月已來出攻於背久不瘳積聚作
膿血為瘡內漏大內塞排膿散方

山茱萸

五味子

茯苓

乾薑

各六分

當歸

四分

附子

二分炮

肉蓯蓉

八分

石斛

五分

兔絲子

三分酒漬

巴戟天

八分

瞿麥

三分一云地麥地膚子也

遠志

八分去心

人參

五分

甘草

五分炙

麥門冬

八分志心

石葦

四分

芍藥

四分

芍藥

五分

乾地黄

八分

桂心

五分

右二十味為散酒服方寸匕日三夜一稍加至兩匕
長服終身不發癰瘡忌同前

又內補散療癰疽發背方

蜀升麻

黃芩

人參

各二分

乾薑

白斂

桂心

甘草炙

附子炮

防風

各一兩

芎藭

一兩

赤小豆

右十一味為散酒服方寸匕日三夜再

一云蜀椒非

又內補散主癰疽發背已潰排膿生肉方

當歸

桂心

人參

各二兩

芎藭

厚朴

炙

桔梗

甘草

炙

防風

白芷

各一兩

右九味為散酒服方寸匕日三夜再瘡未合服勿停

忌 范汪同

又瞿麥散主排膿止痛利小便方

瞿麥 二兩

芍藥 二兩

桂心 半兩

赤小豆 半合

芎藭 半兩

白斂 半兩

黃芪 一兩

當歸 二兩

麥門冬 二兩
去心

右九味為散先食溫酒服方寸匕日三忌生葱

冀深師同

又薏苡仁散主令癰自潰長肌肉方

薏苡仁

桂心

乾薑

白斂

當歸

肉蓯蓉

各一兩

右六味為散先食溫酒服方寸匕日三夜再

翼同

又黃芪竹葉湯主胃背遊熱癰疽方

生地黄

八兩

黃芪

甘草

炙

芍藥

黃芩

各三兩

人參

石膏

碎

芎藭

當歸

各二兩

生薑

五兩

大棗

三十枚擘

半夏

四兩洗

淡竹葉

切一升

麥門冬

去心三兩

右十四味以水一斗二升煮竹葉取九升去滓內藥

煮取三升分四服相去如人行五六里再服日三夜

一忌海藻松菜羊肉錫

古今錄驗同

又排膿內塞散主大瘡熱已退膿血不止瘡中肉虛疼痛方

防風

茯苓

白芷

桔梗

遠志

去心

甘草

炙

人參

芎藭

當歸

黃芪

各一兩

桂心

二分

附子

炮二枚

厚朴

二兩

赤小豆

五合熬

右十四味搗散酒服方寸匕日三夜一忌同前

又麝香膏主諸惡瘡及癰疽發背上惡肉方

麝香

研

雄黃

研

真珠

研各一兩

礬石

一兩熬

右四味細篩以猪膏攪令如泥塗惡肉盡止更傅生

肉膏佳

又療癰疽敗壞生肉膏方

生地黄

一斤

辛夷

獨活

當歸

黃芪

大黃

芎藭

各一兩

薤白

五兩

白芷

芍藥

黃芩

續斷
各一兩

右十味切以臘月豬脂四升煎傳之佳

又方

大黃

附子
炮

芍藥

雄黃

真珠

各一兩

白斂

礬石
燒

黃芩

蘭茹

各二兩

雌黃

一兩

莽草

一兩

右十一味先以豬膏一升半煎六沸去滓內蘭茹礬

石末攪之塗瘡上惡肉盡止

劉涓子同

又方

蘭茹

漆頭者

礬石

各二分熬

雄黃

二分研

硫黃

二分

右四味為散內瘡口中惡肉盡止勿使過好肉也

又發背上初欲作腫即服此方

梔子仁

一百枚

大黃

升麻

黃芩

甘草

炙各三兩

右五味切以水九升煮取三升半分三服使利便止

不下更進一服忌海藻菰菜從瞿麥散以下九方並

療發背部中已次之

丈仲備急同並出
第二十三卷中

范汪療癰腫發背虎牙散方

虎牙

灸

乾薑

附子

炮

當歸

甘草

灸

防風

桂心

王不留行

茯苓

各一兩

右九味擣下篩服方寸匕日三忌同前

出第三十
一卷中

又療癰發背排膿內補鐵屑散方

當歸

人參

細辛

甘草

灸

菴蓉

黃芪

桂心

防風

黃芩

鐵屑

芎藭

芍藥

右十二味各等分合搗為散服方寸匕忌同前

又療癰腫牢核發背成膿莽草膏方

莽草

芎藭

當歸

細辛

附子

炮

黃芩

烏頭

炮

牛膝

躑躅

野葛

茯苓

防風

杜衡

各一兩

豬脂

二斤

右十四味切用猪肪合煎去滓傳瘡上日再忌同前
又卓氏白膏療癰疽發背金瘡已壞及未敗火瘡諸瘍
疥患療之方

當歸

附子

炮

細辛

芎藭

續斷

牛膝

通草

甘草

炙

白芷

各二兩

蜀椒

三合

芍藥

黃芪

各一兩

右十二味吹咀以猪膏二升煎之微火上以白芷色
黃藥成絞去滓以傳瘡上日三忌同前

又療發背發乳房及諸惡瘡膏方

黃連

當歸

馬齒

芎藭

薯蕷

各一兩

珍珠

十四枚

礬石

半兩燒

黃蘗

半兩

石葦

三分去毛

生竹皮

三合

猪肪

一斤

右十一味㕮咀細切肪美酒一升合煎石葦焦膏成去滓有病稍稍傳上亦可酒服棗核大一枚忌同前

並出第四

十一卷中

救急療發背百無不差方

取猪羊脂切作片冷水浸取貼上暖輒易之五六
十片即差若初貼少許即寒寒定好眠甚妙

又療發背若初覺赤腫腫上作小瘡疼不可近方

急用針刺上七八針取冷水用筒注射腫上日夜

不止疼歇腫消

出第五
卷中

又療發背方

取白麩搜圍腫四畔令童子七人尿漬之

又方

以馬糞封之乾易婦人發乳亦差

又方

取蔚臭草擣取汁服一雞子渾封上熱即易之

又方

擣地菰汁一升日再服以差止

又方

大黃

石灰

熬

小豆

右三味等分末白酒和塗立效忌羊肉熱麪大酢

並出

第六
卷中

近效凡發背皆發出自腸胃流入五藏仕流多脚氣為主或有先服乳石并熱肉麪并失饑房室過度皆作此疾縱身不曾服乳石先代服亦有此病或有下里人服麪過度亦有患者請依後方萬不失一發背亦覺有腫即須審看根硬軟如硬頭一點白燒四邊紫黑色時掣痛憎寒不食狀如天行此石癰知是此狀即須當上灸一百壯艾炷大如鼠屎許大凡發背初亦一點白四邊

赤色漸漸長大或盃盞并碗許大四邊生飯漿小小瘡如粟米大亦時時抽掣痛此兩狀皆是死病一日內堪醫十日以外不濟就中冬月得此病即延得三五日其發背初覺即須當頭灸二十一壯如盃許大即五花灸之各二十一壯即服牛蒡子枯樓葛粉第二服犀角湯瀉之不然服犀角丸亦得大效也忌梨鯉魚麪酒肉漿水粥

真鴻臚
賈顯錄

凡發背候憎寒壯熱身如拘束或口乾不用食瘡初出

如青紫色者毒重赤者輕膿如稀泔者極重膿稠白赤

者輕

張道士昇玄
房陵口錄留

又療惡寒皴皴似欲發背或已生瘡腫隱癰起方

硝石 三兩

右一味以煖水一斗和令消待冷取故青布疊三重
可似欲赤處方圓濕布揜根熱即換之頻易差

又療發背及一切毒腫方

生麻油

六合

黃丹

二兩半

地膽

兩錢搗
碎篩

生栗子

四十九枚取大小中者熬焦去皮碎絹篩

右四味和於銅器中盛用炭火重湯煎候沫溢出與器口欲平取小麥一合分二人嚼取筋急內藥中攪使與相合膏擎下安銅器冷水中成膏訖以故綿塗膏貼所苦處晨夕換膏

又療前瘡定訖令生肌方

黃四員外云極効

麝香

兩錢

棗皮灰

半兩

生麻油

六合

右三味依法和用火重湯上煎十餘沸稀稠前藥相

似取故綿塗膏貼瘡上膏漸取膠減唯得喫白羊頭肉但是豆並不得喫餘如藥法

又療癰腫犀角丸主腸癰乳癰發背一切毒腫服之化為水神驗方

犀角

十二分

蜀升麻

黃芩

各四分

大黃

五分

防風

四分

巴豆

二十二枚去心皮熬令黃

人參

四分

當歸

四分

黃芪

四分

乾蓼藍

黃連

甘草

炙

梔子仁

各四分

右十三味搗為末別搗巴豆成膏內末和以杵研搗
令相得鍊蜜和搜更搗二三百杵煖湯服三丸如梧
子得利兩三行喫冷粥止即差不利加至四五丸初
服取快利後漸減丸數取鴨溲微洩為度老小以意
增減腫消及和潤乃止利却黃水即覺輕皮皴色變
一切腫皆內消神驗不可論忌熱麪蒜猪肉蘆笋魚
海藻菰菜生冷粘食以上並主發背

癰疽發背雜療方二十六首

劉涓子療發背發乳口已合皮上急痛生肉摩跗折丹
參膏方

丹參

防風

白芷

細辛

芎藭

黃芩

芍藥

牛膝

大黃

槐子

獨活

當歸

各一兩

又十二味切以臘月猪脂五升微火煎三上三下膏

摩病日三四不須向火

古今錄驗同
出第五卷中

肘後療諸癰疽發背及乳方

熬粢粉令黑雞子白和之以塗練上貼癰小穿練

上作小口以泄毒氣令散燥復易之此藥神效

仲文

備急

同

又方

以釜底土擣取散以雞子中黃和塗之加少豉彌

良以五月葫及少鹽佳

文仲備急同一本無下一法

又方

取茱萸一升擣之以苦酒和貼癰上乾易之佳

刪繁療癰疽發背九物大黃薄貼方

大黃

黃芩

各三兩

白芷

二兩

寒水石

五兩

白斂

五兩

黃蘗

二兩

石膏

赤石脂

黃連

各三兩

右藥下篩以三合投粉麋二升中和之薄塗紙貼腫

上燥易之腫下止不下厚傅之忌生冷熱麪大酢

又蝟皮散療諸瘻及浮核壞敗并主男子發背女子發

乳等癰疽或膿血肉瘤方

蝟皮

燒一具

杜仲

炙八分

續斷

五分

附子

炮

地榆

分各五

厚朴

八分

藁本

五分

當歸

桂心

分各五

小露蜂房

燒一具

右十味搗篩為散服方寸匕日三服酒進取差止忌

猪肉生葱冷水

又陵鯉甲散療癰背乳房癰腫方

陵鯉

一頭取
甲爪炙

桂心

三分

當歸

二分

右三味搗篩為散服方寸匕日三服酒進

出第九
卷中

千金療癰疽發背猪蹄湯方

猪蹄

一具治如食法

黃芪

黃連

芍藥

各三分

黃芩

二兩

薔薇根

狼牙根

各八兩

右七味以水三斗煮蹄令熟澄取二斗清切藥煮取一斗洗瘡一食頃以綿拭燥著生肉膏日二差生痂止痛加當歸甘草各二兩

又療癰疽發十指或起膀胱及發背後生惡肉方

猪蹄

一具

當歸

大黃

芎藭

芍藥

黃芩

獨活

莽草

各一兩

右八味蹄取膝下斷制如食法以水二斗煮取八升內藥煮取四升去滓漬瘡兩食頃拭令燥以麝香膏傅之其方在前發背部中只有四味者是也

又生肉膏主癰疽發背已潰令生肉方

甘草

炙

當歸

白芷

茯苓

蜀椒

細辛

各二兩

烏喙

六枚

薤白

二十莖

乾地黄

三兩

續斷

一兩無以蛇銜替之

右十味以好酢半升相和漬二宿猪膏三斤煎令三

沸三上三下膏成使用

劉涓子同

又癰發腹背陰匿處通身有數十者方

取牛糞乾者燒擣下重絹以雞子白和以塗之乾

復易

肘後張文仲備急同

又若已結膿使聚長者方

以生栝樓根細擣苦酒和傅上燥復易之末赤小

豆亦佳

又凡發背為癰疽已潰未潰者方

以香豉三升少與水和熟搗成強泥可腫作餅厚
三分已有孔勿覆孔可腫上布豉餅艾列其上灸
其豉使溫溫熱而已勿令破肉也其熱痛急易之
癰疽當減便得安或一日二日灸之若先有瘡孔

孔中汁出即差

備急文仲
並翼同

又癰腫發背初作及經十日以上腫勢焮熱毒氣猛盛
日夜疼痛百藥不治者方

假段雞子 一枚

新出狗矢

如雞子大

右二味攪令調和微火熬之令稀稠得所捻作餅子
腫頭堅處貼之以紙貼上以綿抹之時時看之覺餅
子熱即易勿令動轉及歇氣經一夜定其多日患者

三日貼一度差止

謹按千金論曰此方穢惡不可施於貴勝然其愈疾一切諸方皆不

及又自外諸方還復備員作儀注而已學者常
當曉斯以備諸急云耳並出第二十三卷中

千金翼諸癰腫發背及癰癰已潰爛疼痛方

蒸糜穀更遞熨之當即愈

一云蒿薇穀更灸熨之

又連翹五香湯主一切惡核瘡腫方

連翹

射干

升麻

獨活

各二兩

桑寄生

二兩

通草

二兩

大黃

三兩

丁香

一兩

青木香

二兩

沉香

二兩

薰陸香

二兩

麝香

三兩

右十二味咬咀以水九升煮減半內竹瀝二升煮取三升分三服未差中間常服佳

又五香湯主惡氣毒腫方

沉香

青木香

丁香

各一兩

薰陸香

一兩

麝香

半兩

右五味切以水五升煮取一升半分三服

集驗方用雞舌香一

兩不用丁香出第二十四卷中

崔氏療發背及諸瘡久不差有效方

先以甘草湯洗瘡拭極乾乃嚼胡麻傅上乾即易

從旦至日西去胡麻乃取黃連末滑石末中半相

和以傅瘡上數數易明日又依前傅胡麻及黃連

等末更不須洗瘡不過六七日即差

必効備急同

又連翹湯療患瘡腫而渴方

連翹

蜀升麻

各二兩

黃芩

三兩

枳實

二兩炙

乾藍

三兩

芍藥

二兩

玄參

二兩

白斂

二兩

甘草

二兩炙

羚羊角

二兩屑

通草

二兩

黃芪

二兩

大黃

三兩

右十三味切以水八升煮取二升半分三服利一兩

行後更服去大黃乾藍即不利忌海藻松菜

又犀角飲子方

犀角

三兩
屑

羚羊角

三兩
屑

右二味以水八升煮取三升渴即飲盡更作之時熱

恐壞懸著井底甚妙

又五香連翹湯療惡瘡熱毒腫恐惡毒氣入腹兼取利

以洩毒氣方

連翹

三兩

蜀升麻

二兩

薰陸香

二兩

淡竹瀝

一升

麝香

一分
研

青木香

二兩

丁香

一兩

獨活

二兩

寄生

三兩

射干

二兩

甘草

二兩

沉香

一兩

大黃

四兩水一升別漬

朴硝

二兩熬乾別內

右十四味切以水一斗煮取二升半絞去滓然後內

大黃朴硝竹瀝更煮一兩沸去滓內麝香分溫三服

服別相去如人行十里久以得利一二行為度慎雞

猪魚蒜生冷酢滑油膩麪食小豆五辛葵菜等

備急文仲

同並出第

五卷中

備急葛氏療始發諸癰疽發背及乳房方

皆灸上百壯半夏末雞子白和塗良姚云生者神

驗以水和塗之

肘後文仲古今錄驗小品並同

又方

以酢和墓上土茱萸搗薑小蒜薄貼並良

肘後文仲同並

出第四卷中

救急療熱毒風丹並發背犀角膏方

犀角

六分屑

升麻

十大分

羚羊角

六分

梔子仁

七分

枚

薤白

切一升

吳藍

八分大藍亦得

玄參

六分

續斷

大黃

白斂

射干

白芷

各六分

蛇銜

切一分

寒水石

十二分

黃芩

六分

慎火草

切一分

麻黃

六分
去節

右十七味切以竹瀝三升生地黃汁五合漬藥一宿

內豬脂二升微火上煎十上十下候白芷黃膏成去

滓塗病上

出第五
卷中

文仲療發背及婦人發乳及腸癰木占斯散方

木占斯

厚朴

炙

甘草

炙

細辛

栝樓

防風

乾薑

人參

桔梗

敗醬草

各一兩

右十味為散酒服方寸匕日七夜四以多為度病在上當吐病在下當下膿血此謂腸癰之屬凡癰腫即可服兼療諸疽痔若瘡已潰便早愈發背無有不療常服去敗醬亦療婦人諸產癥瘕亦良

是劉涓子方千金范汪刪

繁古今錄驗同出第五卷中

古今錄驗療諸癰瘡發背有膿血當歸貼方

當歸

一分

蟾蜍

一分

丹參

一分

附子

一分炮

蠟蜜 一分

梔子 十枚

桂心 一分

膠 一分

右八味合煎以貼瘡上

出第二十卷中



外臺秘要方卷二十四